

**TEZAU LITURGIC**  
**21 AUGUST**

**ACATISTUL**  
**SF. CUVIOS**  
**AVRAMIE**  
**DE LA**  
**SMOLENSK**



**MOSCOVA, 2000**



# **Акафист**

## **святому преподобному**

## **Аврамию, Смоленскому**

## **чудотворцу**

### **Кондак 1**

---

Избранный угодниче Христов и чудотворче предивный, в житии твоём освящен от утробы матери наставляти люди на путь Христова смирения, и ныне со Ангелы предстояй Престолу Божию, сподоби нас восхвалити тя песнми с любовью, да молитвами твоими от всяких бед и скорбей избавлени зовем ти:

Радуйся, преподобне отче Авраамие, Смоленский чудотворче.

### **Икос 1**

---

Ангелов сожитель и человеком заступник воистинну явился еси, преподобне отче Авраамие, благоволением всех Творца Христа Бога, Егоже возлюбил еси от юности и за Негоже

претерпел еси клеветы вражьи. Темже прими от нас сия хваления:

Радуйся, звездо пресветлая благочестия.

Радуйся, светило, во тме нечестия преславно возсиявшее.

Радуйся, клеветников обличителю.

Радуйся, Христовы веры небоязненный проповедниче.

Радуйся, евангельскаго учения доблий последователю.

Радуйся, закона Господня теплейший хранителю.

Радуйся, жизнь временную пременивый на сокровище вечное небесное.

Радуйся, учения Христова бисер многоценный стяжавый.

Радуйся, Христовым учением душу твою просветивый.

Радуйся, удостоивыйся благодатнаго осенения свыше.

Радуйся, явивыйся добродетелей жилище чистотою преукрашенное.

Радуйся, Духа Святаго обитель прекрасная.

Радуйся, преподобне отче Авраамие,  
Смоленский чудотворче.

### **Кондак 2**

Видя Христос Господь душу твою к приятию  
благодати чистотою и милостынею  
предуготованную, светом познания Своего  
просвети ты от юности и показа ты  
проповедника благочестия преизрядна, и твоя  
добродетели помянув любомилосердно,  
спасаемых части сотвори ты общника в  
Небеснем Царствии, идеже со Ангелы поеши:  
Аллилуиа.

### **Икос 2**

Разум богопросвещенный даровася тебе,  
свiate Авраамие, имже ясно проразумел еси тщету  
душепагубную жития привременнаго и онаго  
уклонитися, Христа же взыскати потщался еси.  
Вседушно темже взываем ти:

Радуйся, блаженный последователю Христов.

Радуйся, любителю заповедей Его  
преискренний.

Радуйся, крине благоуханный рая  
превышняго.

Радуйся, цвете прекрасный вертограда Иисусова.

Радуйся, богатство земное ни во что же вменивый.

Радуйся, стяжания тленная презревый.

Радуйся, храмы Божия и нищия удовлявый.

Радуйся, руками убогих сокровища твоя горе предославыи.

Радуйся, яко не уклонился еси в сеть любостяжания.

Радуйся, яко неуловимъ пребыл еси мрежею сребролюбия.

Радуйся, мудрый купче Царствия Небеснаго.

Радуйся, верный рабе, данный тебе талант усугубивый.

Радуйся, преподобне отче Авраамие, Смоленский чудотворче.

### **Кондак 3**

Сила Вышняго укрепи тя на подвиг проповеднический, блаженне Авраамие: не терпя бо видети пагубу душ человеческих, ревностию разжеглся еси о Боге живе поучая приходящих к тебе благочестно проводить житие и не

отступить от заповедей Христа и звати Ему:  
Аллилуиа.

### **Икос 3**

---

Имуще духом злобы помраченный ум, не  
восхотеша людие смоленские приникнути в  
разум словес твоих духоносных, но клеветы на  
тя воздвигше, призваша тя на судище. Мы же,  
ублажающе терпение твое, глаголем:

Радуйся, Христа вседушно возлюбивый.

Радвйся, к Нему любовь во исповедании  
явивый.

Радуйся, апостолом поревновавый.

Радуйся, орган Святаго Духа бывый.

Радуйся, благовестия евангелскаго уста  
богоглаголивая.

Радуйся, словеса жизни вечныя провещавый.

Радуйся, поношение за пресладкаго ти  
Иисуса веселяся претерпевый.

Радвйся, поругание и досаждение за Него  
благодарно со смирением восприявый.

Радуйся, яко во исповедании Христове  
непоколебимь пребыл еси.

Радуйся, наветы вражия яко паучину  
потребивый.

Радуйся, святче Божий, в мужестве  
неодоленный.

Радуйся, добропобедниче в терпении  
непреклонный.

Радуйся, преподобне отче Авраамие,  
Смоленский чудотворче.

#### **Кондак 4**

---

Бурею злобы дышуще, не терпяще твоего  
обличения, людие смоленские всечасно терзаху  
тя, яко агнца незлобива зверие дивии,  
покушающесе отвратити жаждущих твоея  
проповеди евангелския, но ничтоже успеха  
омраченнии: силою бо свыше укрепляемь,  
посрамил еси оных ухищрение, немолчно  
проповедуя Христа и Единого Творца Бога и  
вопия Ему: Аллилуиа.

#### **Икос 4**

---

Слышавше увещательныя твоя глаголы к  
людем смоленским, Авраамие святе, гонители  
твои беззаконнии прещаху стражею жаждущым  
словес твоих послушати. Мы же, дивящесе

величеству проповедания твоего, зовем ти:  
Радуйся, учителю благочествия.

Радуйся, посрамителю нечестия.

Радуйся, словесы благодати, яко утварию  
многоценною, Церковь украсивый.

Радуйся, ни во что же злоречие вменивый.

Радуйся, твоею твердостью гонители  
сокрушивый.

Радуйся, за прелюбезнаго ти Иисуса вся  
вражья ухищрения разрушивый.

Радуйся, исповеданием на суде сочетавайся  
Христу распяту.

Радуйся, ликовствуяй в чертозе небеснаго  
Домовладыки.

Радуйся, у престола Божия предстояй с  
горними силами.

Радуйся, откровенным лицом созерцай славу  
трисияннаго Божества.

Радуйся, от райских высот приникаяй  
благосердием твоим к нам земнородным.

Радуйся, спасаяй от бед веру и любовь к тебе  
имущих.

## Кондак 5

---

Богомудрым проповедником апостолом подражал еси, Аврамие, вопия: Христа чту, Единого же Его люблю и проповедати людем приискренне желаю, сердцем и усты воспевая Ему: Аллилуиа.

## Икос 5

---

Видяще тя непреклонна и непобедима проповедника Христова Евангелия, устоявша противу козни вражия и доблестно претерпевша прещения святителя, внемгда удалился еси во обитель Богородицы, вопием:

Радуйся, исповедниче Христов непобедимый.

Радуйся, адаманте терпения крепчайший.

Радуйся, новый проповедниче благочестия.

Радуйся, древним подражателю равночестный.

Радуйся, чудотворения благодатию от Господа обогащенный.

Радуйся, целеб подателю всеблагий.

Радуйся, во благоухании святыни почиваяй.

Радуйся, ароматы райскими облагоухаяй души верных.

Радуйся, источниче даров многоразличных.

Радуйся, реко приснотекущая чудес.

Радуйся, милосердия к страждущим сокровище неистощаемое.

Радуйся, болящих врачевство неоскудное.

Радуйся, преподобне отче Авраамие, Смоленский чудотворче.

### **Кондак 6**

---

О неизреченная премудрость Божия! Ихже Бог предустави, тех и призва, сих и оправда, ихже оправда, сих и прослави: на тебе, святче Божий, сбысться сие слово апостола. Видя Господь, яко избран еси сосуд и Сына Божия Христа проповедал еси, претерпел за Него клеветы, сотвори тя славна чудесы, яже показуеши всем чтущым любовь твою и вопиющим Богу: Аллилуиа.

### **Икос 6**

---

Возсиял еси преславно чудотворения лучами, умолив Господа, яко древний Илия, напоити дождем жаждущую землю Смоленскую, и по

явлении мощей твоих, святе Авраамие, во граде Смоленске, показуя людям свое неизреченное милосердие, прибегающим к твоей многоцелебной раце и святей иконе, юже обстояще, вопием ти:

Радуйся, града нашего похвало и утверждение.

Радуйся, обители Спасовы, в нейже почил еси, присное заступление.

радуйся, подвизающимся в ней благодатное вспоможение.

Радуйся, оных покрове и защищение.

Радуйся, недугующих скорый целебниче.

Радуйся, унывающих благонадежное возбуждение.

Радуйся, скорбящих утешение.

Радуйся, нищих богатство.

Радуйся, болящих исцеление.

Радуйся, изнемогающих укрепление.

Радуйся, ревнующих в посте и молитве споспешниче.

Радуйся, преподобне отче Авраамие, Смоленский чудотворче.

## Кондак 7

---

Хотя Человеколюбец Господь явити обилие щедрот своих стране Смоленской, дарова нам тебе угодника и молитвенника богоприятного, чудес благодать источающа и недужных безмеждно врачующа: темже благодарим тобою благодеющего нам Господа, и светло празднуем память твою, с любовью к раце мощей твоих припадающе и Христу зовуще: Аллилуиа.

## Икос 7

---

Новаго твоя Христова исповедника и чудотворца славнаго любовью ублажаем и радуящиеся глаголем: Радуйся, деннице лучезарная земли Смоленския.

Радуйся, луче немерцающий солнца правды Христа.

Радуйся, угодниче Господень, предивный в чудесех.

Радуйся, праведниче, прославленный на небеси и на земли.

Радуйся, нетлением мощей твоих в истине воскресения мертвых уверяяй.

Радуйся, образ бессмертия в смертном телеси показуяй.

Радуйся, яко тебе дана бысть благодать за ны молитися и возбуждати нас ко благим делом.

Радуйся, яко по преставлении твоём благодеяния просящим подаваеши.

Радуйся, от смертоносных язв и болезней притекающыя к тебе сохраняяй.

Радуйся, бедствующым и обидимым помогай.

Радуйся, боголюбивых душ непостыдное упование.

Радуйся, любящих тя присное утешение.

Радуйся, преподобне отче Авраамие, Смоленский чудотворче.

### **Кондак 8**

Странно есть видети мертвенное тело, жизнь присносущную являющее, во гробе лежащее и недуги врачующее, но веруем несумненно, угодниче Христов Авраамие, яко мощми твоими святыми, аще и сокровенными, почиваяй zde и духом твоим не отлучаешия от нас недостойных, честную память твою с любовию

почитающих и пред святою твоею иконою Христу благодарне зовущих: Аллилуиа.

## Икос 8

---

Весь в вышних еси, святче Божий Авраамие, во светлости святых торжествуеши и наслаждаеши неизреченных благ небесных: вемы же, яко и нас земных и перстных не забываеши, но и от горних высот милостивно к нам приникаеши, подвизая чествовати тя сими похвалами:

Радуйся, благочестия утверждение.

Радуйся, православия похвало.

Радуйся, земли Российския благодатное осенение.

Радуйся, града Смоленска светлое радование.

Радуйся, многоплодная розго винограда Христова.

Радуйся, гражданине горняго града Иерусалима небеснаго.

Радуйся, в преславнем лице преподобных пребывая.

Радуйся, рая жителю всеблаженный.

Радуйся, царствия Христова наследниче.

Радуйся, вечныя блаженныя жизни  
сопричастниче.

Радуйся, прибежище наше и защищение.

Радуйся, скорое и безмездное недугов  
врачевание.

Радуйся, преподобне отче Авраамие,  
Смоленский чудотворче.

### **Кондак 9**

---

Вси ангели небеснии радостно восприяша тя  
во обители райския, богомудре отче Авраамие,  
идеже святая твоя душа почеть победную  
восприят от Христа Спасителя, праведнаго  
мздовоздаятеля подвижающихся за имя святое  
Его на земли: прославляя бо их на небеси с  
горними лики, сподобляет предстояния у  
престола Своего, да поют Ему немолчно:  
Аллилуиа.

### **Икос 9**

---

Ветийством злочестивым и прельщением  
лукавым неуловлен пребыл еси, отче Авраамие,  
егда предстал еси на суд святительский земли  
смоленския, темже яко добляго исповедника  
Христова ублажаем тя и зовем: Радуйся,  
просвещенный зарею Пресвятаго Духа.

Радуйся, яко страх малодушный пред  
судищем от себе отрясл еси.

Радуйся, яко щитом веры оградился еси.

Радуйся, неумолкающий благовестниче силы  
Божия.

Радуйся, неутомимый исповедниче  
евангелския истины.

Радуйся, истинный поклонниче, духом и  
истиною кланяйся Творцу.

Радуйся, мужу желаний духовных.

Радуйся, взыскавый Христа, отринув  
мирскую прелесть.

Радуйся, странники и нищья питаемый от  
трудов своих праведных.

Радуйся, елеем милости умащенная главо.

Радуйся, горо добродетелей.

Радуйся, преподобне отче Авраамие,  
Смоленский чудотворче.

### **Кондак 10**

---

Спаستися нам преискренне желая, молишися  
за нас горе у престола Божия, угодниче Христов  
Авраамие, и твоими молитвами пособишь

нам в странствии многотруднем земнаго жития, еже в покаянии и благочестии скончати, да сподобимся и с тобою воспевати Христу и Богу Отцу со Святым Духом: Аллилуиа.

## Икос 10

---

Стену защищения имуще твоя святая молитвы, Аврамие чудне, радуемся грешнии и чтем любовью память твою зовуще:

Радуйся, великоименитый наш заступниче.

Радуйся, небожителю богопросвещенный.

Радуйся, чудотворче дивный и милостивый.

радуйся, благий послушателю сущих в скорбех.

Радуйся, предваряй призывающыя тя в бедах.

Радуйся, приводящий грешныя ко исправлению.

Радуйся, миро врачевное недугом многоразличным.

Радуйся, не токмо телесных, но и душевных болезней целителю.

Радуйся, духов нечистых от человеков прогонителю.

Радуйся, даров благодатных независтный подателю.

Радуйся, благоуханием святыни твоея услаждай души наша.

Радуйся, чудесы твоими утверждай нас во истине святыя православныя веры.

Радуйся, преподобне отче Авраамие, Смоленский чудотворче.

### **Кондак 11**

---

Пение молебное и похвалу сию смиренную не презри, отче Авраамие, се бо верою и любовью к тебе подвизаеми, соборне обстояще образ твой святыи, ублажаем тя заступника нашего, и слезно просим: молися за ны ко Господу, к Немуже имаши невозбранное дерзновение и твоих молитв благодатное действо, да благодарне зовем Ему, дивному во святых: Аллилуиа.

### **Икос 11**

---

Светоносным Троическим сияние горе озаренный, Авраамие святе, просвети и наша сердца тьмою греховною покровенная, да елеем благих дел возжегше угасшыя наша светильники, сподобимся брачнаго Христова чертога, идеже

ТЫ ВСЕЛЯЕШИСЯ СО СВЯТЫМИ И СЛЫШИШИ ОТ НАС  
СЯ БЛАГОХВАЛЕНИЯ:

Радуйся, от Бога данный покровителю нам.

Радуйся, ангелоподобный человек.

Радуйся, устройтелю обители нашея.

Радуйся, проповедниче неутомимый.

Радуйся, яко рука твоя изобилно помогаше  
обители твоей скудной.

Радуйся, яко мудре расточал еси богатство  
тленное, текущее к тебе.

Радуйся, пременивый оное на нетленная  
блага небесная.

Радуйся, наслаждайся блаженства  
милостивых.

Радуйся, предстояй Агнцу в лице  
преподобных.

Радуйся, ликовствуяй в селении праведных.

Радуйся, в житии твоём мудрость чудную  
явивый.

Радуйся, иноков обители своея добре  
управивый.

Радуйся, преподобне отче Авраамие,  
Смоленский чудотворче.

### **Кондак 11**

---

Благодать и милость испроси нам у Христа и Спасителя нашего, святе и славне отче Авраамие, веруем бо несумненно, яко еже просиши, дарует ти всеблагий Владыка: темже и о нас грешных не престай умоляти Его благосердие и испроси нам дар коемуждо благопотребен, да зовем всех благих виновнику и подателю Богу: Аллилуиа.

### **Икос 12**

---

Поем твоя апостолския труды, величаем твое ангельское терпение и незлобие, славим от сокровенных мощей твоих токи чудес, ихже источаеши непрестанно, подвизая нас звати тебе:

Радуйся, архангелов и ангелов сослужителю.

Радуйся, патриархов и пророков спредстоятелю.

Радуйся, апостолов единоревнителю.

Радуйся, подвижников красото.

Радуйся, святителей и преподобных собеседниче.

Радуйся, праведных и всех святых сожителю.

Радуйся, яко свыше чудес действием украсился еси.

Радуйся, в честных и многоцелебных мощех своих с нами пребываяй.

Радуйся, и духом твоим николиже от нас разлучайся.

Радуйся, отрадо наша и в скорбех утешение.

Радуйся, недугующих исцеление.

Радуйся, согрешающих исправление.

Радуйся, преподобне отче Авраамие, Смоленский чудотворче.

### **Кондак 13**

---

О преславный угодниче Христов и чудотворче Смоленския земли Авраамие, милостивно прием сие малое моление наше, тебе приносимое, умоли Царя царствующих и Господа господствующих Христа Бога нашего, избавити нас от всякия скорби и нужды в жизни сей и мучений вечных по кончине нашей, да сподобимся в Царствии Небеснем вкупе с тобою пети Богу: Аллилуиа.

Кондак сей глаголи трижды, таже икос 1-й и кондак 1-й.

### Молитва

О великий отче Авраамие, доблий подвижниче Христов, в скорбех и напастех преславный наш помощниче и защитниче: ничтоже возможе отлучити тя от любве ко Господу Иисусу: ни гонения, ни клеветы, ни прещения врагов твоих. Ты, яко лев, исшел еси на брань противу волков мысленных, духов злобы, подвигших на тя, ради добраго твоего исповедания и проповедания, единоплеменный тебе народ смоленский: и яко огненная стрела поразил еси твоих гонителей силою благодати Святаго Духа и крепкия любве твоя к Богу: и яко орел, воспарил еси в горния обители Отца Небеснаго, наследовав тамо вечную жизнь, славу и блаженство неизреченное. Веруем, святче Божий, яко предстоя со ангелы и всеми святыми престолу славы Триипостаснаго Бога, усердныя и богоприятныя возносиши молитвы не токмо о святей обители сей, тобою устроенной, и о граде нашем Смоленске, но и о всей святей Христовой Церкви, и молим тя молися Господеви: страждущую страну Российскую от лютых

безбожник и власти их да свободит, и да возставит престол православных царей, верных рабов Твоих, в скорби и печали день и ночь вопиющих к Тебе, многоболезненный вопль да услышит, и да изведет от погибели живот наш. Веруем, преславный чудотворче, яко ты силою всемогущаго Господа Иисуса Христа, еще жив сый, умолил еси напоити жаждущую за грехи людей землю смоленскую обилным дождем, и по успении своем источаеши обилныя дары благодатныя помощи во спасение всем с верою к тебе прибегающим и молящимся тебе, наипаче же испрашиваеши кончину с покаянием почитающим тебе, да вси от мала до велика, единодушно прославляем неисповедимое величие благости Божией. Темже с верою и любовью припадающе и благоговейно лобызающе святую икону твою, умоляем тя, добрый на небеси наш молитвенниче и заступниче, помогай нам грешным и смиренным, твоими молитвами во всех скорбех, нуждах и обстояниях наших, сохраняй нас и святую обитель твою и град сей Смоленск (и весь сию и храмы сия) и вся православныя христианы российския страны от всякаго зла и всякия напасти, наипаче же споспешествуй

вечному нашему спасению и всех просящих твоея помощи и заступления. Угодниче Божий, преподобне отче Авраамие, моли Христа Спасителя нашего, да даст той мир и тишину всем православным христианом и да отвратит от нас всякий гнев, на ны движимый, да избавит нас от сетей вражиих, томления во узах греха и мучений адских, и да сподобит нас недостойных и грешных стати одесную Его на суде Его праведном и внити в вечный покой святых Его, идеже празднующих глас непрестанный и неизреченная сладость зрящих доброту лица Его, и тако да возможем с тобою и всеми святыми бесконечно славити Троицу Единосущную и Нераздельную во веки веков. Аминь.



**ПОЛНЫЙ  
АКАФИСТНИК  
КАНОНИЧЕСКИЙ**

**АКАФИСТЫ  
КО ГОСПОДУ БОГУ  
ПРЕСВЯТОЙ  
БОГОРОДИЦЕ  
АРХАНГЕЛАМ  
И АНГЕЛАМ**

**І**

**НОВОЕ  
\* НЕБО**